

E Weihnachtsgeschicht, de zwaade Deil

Iss dess nit schee? Doo hawwe doch drei Leit, die unser Flerschemer Zeidung unn em Honnes soi Ardickelscher uffmerksam lese, sich die Mieh gemacht unn hawwe dem Honnes soi Weihnachtsgeschicht zu End geschriwwe.

Unn alle drei Geschichte unn ihrn Schluss sinn onnerst - unn glaabt merr, hätte zwon-sisch Leit geschriwwe, ess wärn zwon-sisch verschiedene Märcher eraus kumme. So vill Mensche, so vill Idee unn so vill verschiedene Arde, sich in Flerschemerisch auszedricke. Awwer oons kann ich schunn verrote: Die ahl Fraa hott in jeder Geschicht ihr Bündelche Holz behalle unn konnt sich iwwer die Feierdaach wärme unn sich ihr Süppche koche. Sinn also alle Mensche gut, wolle helfe unn koo Unrecht dulde? De Honnes glaabts – unn hält trotzdem soi Hond uffs Portmonnee, wanner unner en Haufe Leit geht.

In unserne Zeidung werrn merr wie versproche die Oisendunge abdrucke. Mir fonge heit oo unn mache om nechste Freidaach weider. Unn höflich wie merr halt sinn, lasse merr die Dame beginne; sie hott aach die gonz Geschicht noocherzehlt unn enn scheene Schluss geschriwwe. Bei de nechste zwaa Geschichte werd dann nor noch ess End erzehlt unn ich versprechs eich, longweilich iss koo vunn dene Geschichte.

In so em kloone Ort an em große Fluß lebte vor Johr und Taach emol e aal Fraa gonz allons. Ihrn Monn war schun long dod. Weil se Holz gebraucht hott, hott se sich om Heilige Obend uff de Wech gemacht. Om onnern Ufer, hot se gedenkt, kennt se was finne. De Fährmonn hott gesacht: „Ich fahr disch emibber umsunst. Abber zerick mußte bezahle, wenn de Holz debei host.“ „Du waast, dass ich in de Bredulje bin. Moin Monn is dod un ich bin e arm alt Fraa“, meent do druffhie die Grete. „Isch will nit brebele, abber host de Holz debei un koo Geld, muß ich des Holz moim Herrn gebe. Mach isch des nit so, ei da sperrt der mich in de Torm“, greint doo de Fährmonn. „Des iss en Kneppdrehher, na ja, villeicht fin isch gar nix“, denkt sich die aal Grete.

Obends kimmt'se widder zum Fluß unn uff ihm krumme Buckel hat se e Bündelche Holz. Dodruffhie sache de Fährmonn: „Ich will joo koo Gedeens mache, abber ich krie Geld von der.“ Do kreint die Grete: „Mach doch nit so en Halles. Ich hab de gonze Taach gesommelt un wenn ich misch heit nit wärme un mir e Süppche koche kann, do bin isch so gut wie hie. Doin Läuskicker werd's verschmerze kenne.“ „Na, Grete, do gibt's koo hannele. Wenn isch des bei dir mach, wolle des die onnern aach“, knodert de Fährmann. „Ei willstest dass ich sterb?“ Grete hockte sich in de Nache un lescht des Holzbündelsche zu ihrne Fieß. Grad als de Fährmonn lospaddede wollt, ruft e dief Männerstimm: „Wadd en Aacheblick. Isch will disch nit strieze, abber isch mißt aach uff die onner Seit.“ Des war koon Einheimische un aach koon Eigeplackte. Ohne irschendwas zu babbele setzte der Fährmonn noch dere Paus de Nache in Beweschung. Die aal Grete hott vor Kält gebibbert und stille Tränscher sin ere ibber ihr Backe gelaafe. De Fremde hott ihr soi Dascheduch gegebbe, damit se sisich mol schneutze konnt. Wie se om onnern Ufer war'n, hott de gute Monn de Grete aus em Nache geholfe und hot ihr des Holzbündelsche in die Hond gedrückt. Grad als de Fährmonn des moniern wollt, doo drickt er em Geld in die Hond und meent: „Des werd fer uns zwaa lange.“ Bevor de Fährmonn was saache un die Grete sich bedonke konnt, war der Kerl schunn ford.

Luzia Platt Kapellenstraße 24 D Flörsheim am Main